

四庫全書

史部

欽定四庫全書

漢藝文志考證卷四

宋 王應麟 撰

論語

論語古二十一篇

出孔子壁中兩子張曰篇後子張問何如可以從政已下

爲篇名曰從政

家語後序云孔安國爲古文論語訓二十一篇何晏序云古論唯博士孔安國爲之訓解而世不傳新論

云文異者四百餘字正義曰孔子舊宅壁中得古文  
經傳即謂論語孝經爲傳也古文者科斗書蒼頡本  
體周所用以今所不識故名古文春秋正義引哀公  
問主於宰我案古論語及孔鄭皆以爲杜主張包周  
等並爲廟主釋文云不知命無以爲君子也魯論無  
此章今從古說文引狐貉之厚絺衣長短右袂色孛  
如也文質份份不使勝食既朝服衽身焉善射小人  
窮斯媿諷曰禱爾于上下神祇友諛佞以杖荷蓑有

荷史而過孔氏之門，孫湯舟皆古文也。

又引論語  
路予之足

齊二十二篇

多問王  
知道

晁氏公武田齊論有問王知道兩篇，詳其名是必論  
內聖之道外王之業，未必非夫子之最致意者。曰張  
侯論爲世所貴，本傳禹爲成帝師，以上好論語難數  
對已問經爲論語章句獻之鄭玄，以張侯論爲本參  
考齊古而爲之法。

孔子家語二十七卷

師古曰：非今  
所有家語

馬昭謂今家語王肅增加非鄭玄所見

肅私定以難玄

孔子三朝七篇

劉向別錄云孔子見魯哀公問政比三朝退而爲此記凡七篇並入大戴禮蜀志秦宓曰昔孔子三見哀公言成七卷裴松之注案中經簿有孔子三朝八卷

一卷目錄餘者所謂七篇

七篇今考大戴禮千本四代虞戴德詒志小辨用兵

少史記漢書文選注所引謂之三朝記爾雅疏張揖

引禮三朝記皆此書也

孔子徒人圖法

大史公曰弟子籍出孔氏古文近是史記孟子世家  
弟子蓋三千焉身通六藝者七十二人索隱云史記  
自子石以右三十五人顯有年名及受業聞見于書  
傳其四十有二人無年及不見書傳家語此例唯有  
三十七人史記所傳七十有七其公良孺秦商顏亥  
叔仲會四人家語有事迹史記闕然自公伯寮秦冉  
鄒單三人家語不載而別有琴牢不知何說而張禹獨

遺之禹身不知王鳳之邪正其不知此固宜然勢位  
足以軒輊一世使斯文遂喪惜哉何晏序云鄭玄就  
魯論篇章考之齊古爲之註艾軒林氏曰康成溺於  
章句其竄定未必審也許氏說文有所謂逸論語是  
康成之說未行而論語散逸已有不傳者說文逸論語曰玉案  
之璫兮其璫猛也如玉之瑩又曰璫璫魯之寶玉也孔子曰美哉璫璫遠而望之與若也近而眎之瑟若也一則理勝二則孚勝初學記亦謂逸論語之文愚謂問王疑即問玉也策文相似季氏篇洪氏  
曰或以爲齊論正義曰齊論者齊人所傳

魯二十篇

釋文曰鄭校周之本以齊古讀正凡五十事皇覽引  
魯讀六事正義曰魯論者魯人所傳即今所行篇次  
是也石經論語載盍毛包周有無不同之說其文有  
增損者其字亦有假借及用古者有字異而訓不遠  
若置其杖賈之哉者後漢傳有遵五迸四之文祝睦  
碑云鄉黨逡逡劉脩碑云鄉黨遜遜如也古今人表  
卑湛尾生高尾生晦厥黨童子祝佗革子成弗昉

廣韻



引子西彼哉彼義切集  
韻引喚爾捨瑟而作

魯安昌侯說二十一篇

何晏序云張禹本受魯論無講齊說善者從之號

闕



及馬融為之傳隋開皇中祕書學士王孝逸於陳人  
處得之劉炫為之作稽疑一篇將以興墜起廢而時  
人已多譏笑之者唐開元中劉知己以為宜行孔廢

鄭諸儒爭難蠡起卒行鄭學許冲上父說文云古文  
孝經昭帝時魯國三老所獻建武時議郎衛宏所校  
按志云孔氏壁中古文則與尚書同出也蓋始出於  
武帝時至昭帝時乃獻之隋志云安國之本亡於梁  
亂儒者皆云劉炫自作之非孔舊本家語後序安國  
爲孝經傳二篇

今有經無傳司馬公爲指解并音  
桓譚新論曰古孝經二十章十八百

七十一字今  
異者四百餘

孝經一篇

十八  
章

隋志河間顏芝所藏漢初芝子貞出之凡十八章千八百七十二字劉向以顏本比古文除其繁惑以十八章為定

雜傳四篇

蔡邕明堂論引魏文侯考經傳蓋雜傳之一也

爾雅二卷

禮三朝記公曰寡人欲學小辯以觀於政其可乎孔子曰爾雅以觀於古足以辯言矣釋詁一篇蓋周公

所作

舊說此書始於周公以教成王

釋言以下或言仲尼所增子夏

所定叔孫通所益梁文所補漢郭威謂爾雅周公所  
制而有張仲孝友等語疑之以問揚雄雄曰記有孔  
子教魯哀公學爾雅爾雅之出遠矣自古學者皆云  
周公作當有所據其後孔子弟子游夏之傳又有所  
記以解釋六藝故有張仲孝友等語劉向謂史佚教  
其子以爾雅父軒林氏曰爾雅一書六籍之戶牖學  
者之要津也古人之學必先通爾雅則六籍百家之

言皆可以類求也及散裂爾雅而投諸箋注說隨意遷文從義變說或拘泥則文亦牽合學者始以訓詁之學爲不足學也釋詁釋言釋訓猶詩之有六義小學之有六書止齋陳氏曰古者重小學漢嘗置博士如毛氏詩訓許氏說文楊氏方言之類皆有所本隋唐以來以科目取士此書浸廢韓退之尚以注蟲魚爲不切則知誦習者寡矣

晁氏曰爾雅小學之類附孝經非是

小爾雅一篇

孔鮒撰十三章申衍詁訓見孔叢子

李軌解  
一卷

古今字一卷

春官外史掌達書名于四方注古曰名今曰字秋官  
大行人諭書名注書之字也聘禮記曰百名以上書  
之於策不滿百名書之於方說文叙倉頡初作書蓋  
依類象形故謂之文其後形聲相益即謂之字字者  
言孳乳而浸多也著於竹帛謂之書書者如也呂氏  
曰秦之文字多李斯趙高所定非保氏之教也樓氏



曰古字不多率假借以爲用後世寢廣隨俗更改多失造字之意

弟子職一篇

管子雜篇第五十九有學則蚤作受業饌饋乃食洒掃執燭請社退習等章

朱文公曰竊疑是作內政時士之子常爲士因作此以教

之

說三篇

周禮注引孝經說蓋緯書非是之謂也

孔子爲曾子陳孝道

致堂胡氏曰曾子門人纘所聞而成之晁氏曰何休

稱子曰吾志在春秋行在孝經

孝經鉤命決云

信斯言也則

孝經乃孔子自著今首章云仲尼居曾子侍則非孔子所著明矣詳其文義當是曾子弟子所爲書

小學

史籀十五篇

說文叙曰宣王太史籀著大篆十五篇與古文或異

艾軒林氏曰大篆出於史籀戰國以來俱用之許氏微得其舊體唐玄度曰秦焚詩書惟易與史篇得全王莽之亂此篇亡失建武中獲九篇章帝時王育爲作解說所不通者十有三晉世此篇廢今畧傳字

體而已

今按說文引王育說

翟氏曰史籀變倉頡之法作大篆

摠天下字一以會意書法之壞自籀始衛恒曰或與

古同或與古異世謂之籀書元帝善史書

應劭曰史籀所作大

篆

安帝年十歲好學史書漢官儀能通蒼頡史籀篇

補蘭臺令史滿歲爲尚書郎歐陽公指石鼓爲籀書  
以前乎籀書則古文科斗也嚴延年善史書奏成於  
手中貢禹亦言郡國擇  
便巧史書者以爲右職王尊傳司隸遣假佐蘇林謂  
取內郡善史書佐給諸府志云尚書御史史書今史  
則外之郡國內之諸府皆  
有史書吏以備制奏也

## 八體六技

說文叙秦書有八體大篆小篆刻符蟲書摹印署書  
父書隸書漢興有草書尉律學僮十七已上始試諷  
籀書九千字乃得爲吏又以八體試之郡移太史并

課最者以爲尚書史書或不正輒舉劾之及亡新居攝使大司空甄豐等校文書之部頗改定古文時有六書古文奇字篆書佐書繆篆鳥蟲書佐書即隸也尚書正義亦云秦有八體亡新六書去大篆刻符及書署書加古文奇字志謂漢興蕭何草律亦著其法曰太史試學童能諷書九千字以上乃得爲史又以六體試之六體者古文奇字篆書隸書繆篆蟲書律即尉律廷尉治獄之律六體乃新莽之制漢興尉律

所試者八體也當從說文叙所謂六技者疑即亡新  
六書蕭子良古今篆隸文體云父書伯氏之職也古  
者文既記笏武亦書父墨數秦始皇以祈禱名山作  
刻符書用題印璽蕭何作署書題蒼龍白虎二闕

蒼頡一篇

說文叙七國文字異形秦初無天下丞相李斯乃秦  
同之罷其不與秦文合者斯作倉頡篇中車府令趙  
高作爰歷篇太史令胡毋敬作博學篇皆取史籀大

篆或頗省改所謂小篆者也

初有隸書以趣約易而古文由此絕矣

考

工記注引蒼頡篇有鞞莞柯櫛頽之推曰蒼頡篇李斯所造而云漢無天下海內并厠豨黥韓覆畔討滅殘非本文也羅氏曰其篇雖名祖蒼頡而實異史籀龜山楊氏曰圖書之文天實兆之非人私智所能爲也秦人以吏爲師嚴是古之禁盡滅先王之籍漢興去秦未遠也科斗書世已無能知者况數千載之後乎揚子曰言心聲也書心畫也世傳小篆李斯趙高

之徒以反古逆亂之心爲之其淵源可知矣

揚子或欲學蒼

顏史篇曰史乎史乎愈於妄闕也

張湯傳爰獄吏用之

### 凡將一篇

文選蜀都賦注引司馬相如凡將篇曰黃潤纖美宜

制禪藝文類聚引凡將篇曰鐘磬等笙筑坎侯

唐志猶有

此書今闕說文引相如說

### 急就一篇

隋唐志謂之急就章顏師古叙曰司馬相如作凡將



篇史游景慕擬而廣之元成之間列於祕府舊得皇象鍾繇衛夫人王羲之所書篇本備加詳覈凡三十章又見崔浩劉芳所注未善遂爲解訓晁氏曰雜記姓名諸物五官等字以教童蒙急就者謂字之難知者緩急可就而求焉羅氏曰一本相傳是吳皇象寫比顏解本無焦滅胡以下六十三字纔三十一章而已國朝太宗皇帝嘗書此篇又於顏本外多齊國山陽兩章凡爲章三十有四此兩章蓋起於東漢按

急就篇末說長安中涇渭街術故此篇亦言洛陽人物之盛以相當而鄠縣以世祖即位之地升其名爲高邑與先漢所改真定常山並列此爲後漢人所續

不疑

元帝善史書游爲此篇皆稍近古傳稱游勤心約忠有所補益宣此類耶

### 訓纂一篇

揚雄傳史篇莫大於倉頡作訓纂說文叙孝宣時召通倉頡讀者

志云徵齊人能正讀者

張敞從受之涼州刺史杜

業沛人爰禮講學大夫秦近亦能言之孝平時徵禮

等百餘人令說文字未央廷中

紀元始五年正月徵天下通知小學史篇

者以禮爲小學元士黃門侍郎揚雄采以作訓纂篇

隋志三蒼三卷李斯作蒼頡篇

江式曰蒼頡爰歷博學後人分五十五章

爲上卷按此即志所謂閭里書師合三篇者

揚雄作訓纂篇

江式曰元壽中作爲中卷

後漢郎中賈魴作滂喜篇

江式曰永元中賈叔郎接記爲下卷

故曰三

蒼徐氏曰賈魴以三蒼之書皆爲隸字隸字始廣而

篆籀轉微說文繫傳以蒼頡爰歷博學爲三蒼

史記正義

引訓纂說文

雄久爲郎校書麟閣見天下上計孝廉

及內郡衛卒會者常提三尺弱翰齋油素四尺以問  
異語歸即以鈐摘次於檠積二十有七歲而書成名  
曰輜軒使者絕代語釋別國方言方言者蓋爾雅之  
流也

十五卷

劉棻從雄學作奇字

注古文之異者

### 杜林蒼頡訓纂一篇

杜鄴傳初鄴從張吉學吉子竦從鄴學問尤長小學  
鄴子林正文字過於鄴竦故世言小學者由杜公

隋志

梁有蒼頡二卷杜林  
注說文引杜林說

# 六書

韓非子曰蒼頡之作書也自環者謂之私背私謂之

公

一云自營爲  
公背公爲公

象事

周禮注云處事  
說文序云指事

象意

周禮注說  
文序云會

意

象聲

周禮注云諧聲說文序云形聲  
周禮疏云書有六體形聲實多

夾漈鄭氏曰

書契之本見於文字獨體爲文合體爲字文有子母

主類爲母從類爲子文字之本出於六書象形指事

文也會意諧聲轉注字也假借者文與字也古三墳

伏羲氏始畫八卦命臣飛龍氏造六書說文引孔子

曰一貫三爲王推十合一爲士稟之爲言續也泰可  
爲酒禾入水也烏𠂔呼也貉之爲言惡也牛羊之字  
以形舉也凡在人下故詰屈狗叩也視犬之字如畫  
狗也未詳所出然似非孔子之言或緯書所載也

諷書九千字以上字或不正輒舉劾

羅氏曰古來用字約少板策所書多者纔百名以上

今漢代試爲史者一童所記至九千字烏覩古所謂

正哉

劉勰云馬字缺畫而石建懼死雖云性謹亦時重文也

龜山楊氏曰先王

之時書必同文故建官以達之所以一道德之歸立  
民信也漢初猶有課試之科舉劾之令以同天下之  
習

古文

科斗之書始於蒼頡其文至三代不改周宣王時雖  
史籀有大篆十五篇猶與科斗並行故終三代所用  
者惟篆與蒼頡二體盧植曰古文科斗近於爲實而  
厭抑流俗降在小學衛宏古文奇字序云秦改古文

以爲篆隸

隸書

趙氏明誠曰庾肩吾云隸書今之正書也張懷瓘六  
體書論亦云隸書者程邈造字皆真正亦曰真書自  
唐以前皆謂楷字爲隸至歐陽公集古錄誤以八分

爲隸書自是舉世凡漢時石刻皆目爲漢隸

東魏大覺寺碑

陰題韓殷隸書  
蓋今楷字也

沙隨程氏曰書苑云蔡文姬言割程

隸字八分取二分割李篆字二分取八分於是爲八



分書千文曰杜蘂鍾隸唐孫過庭草書譜曰元常專精於隸書伯英尤工於草體彼之二美逸少無之此以真行爲隸也鍾王未嘗爲今所謂隸書者也梁蕭子雲以逸少不及元常子敬不及逸少因此研思遂悟隸式此以真行爲隸無疑本朝任珣序范度五體千文云隸則統乎義獻鍾庾歐虞顏柳真草之輩八分則酌乎篆隸之間此又其證也陸氏曰周越書苑云郭忠恕以爲小篆散而八分生八分破而隸書出

隸書悖而行書作行書狂而草書聖以此知隸書乃  
今真書愚按唐六典注亦云隸書典籍表奏及公私  
文疏所用徐鉉謂隸書之法有刪繁補缺之論則其  
僞斷可知矣唐張懷瓘書斷云八分者秦羽人上谷  
王次仲所作始皇時官務稍多得次仲文簡畧赴急  
速之用

臣復續揚雄作十三章

韋昭曰臣班固自謂也

隋唐志班固太甲篇在昔篇各一卷

五者蓋五常之道相湏而備

白虎通曰經常也有五常之道故曰五經樂仁書義  
禮禮易智詩信也與此不同西山真氏曰六經於五  
常之道無不包者今以五常分屬於六藝是樂有仁  
而無義詩有義而無仁也可乎哉

注秦近君

儒林傳秦恭延君增師法至百萬言

近字誤

序六藝爲九種

唐氏曰漢世經先出者不如後出盛傳於後世費氏  
易古文尚書毛詩小戴禮左氏春秋大抵初以經名  
家者後多不傳所謂欲速不達晁氏曰典籍之存詁  
訓之傳皆漢書之力漢書於學者何負而例貶之歟

漢藝文志考證卷四

欽定四庫全書

漢藝文志考證卷五

宋 王應麟 撰

儒文

晏子八篇

隋唐志晏子春秋七卷著其行事及諫諍之言

太史公曰

吾讀晏子春秋禮記  
投壺注引晏子春秋

宗文總目十二卷或以爲後人

采嬰行事爲書故卷頗多於前志柳宗元謂墨子之

徒有齊人者爲之墨好儉晏子以儉名於世故墨子之徒尊著其事以增高爲已術者且其旨多尚同兼愛非樂節用非厚葬久喪非儒明鬼皆出墨子其言

問東及古治子等尤怪誕又往往言墨子聞其道而

稱之此甚顯白者

晏子春秋云墨子聞之曰晏子知道道在爲人失在爲已

後之

錄諸子書者宜列之墨家非晏子爲墨也爲是書者

墨之道也

晁氏從此說

薛氏曰讀孔叢子詰墨怪其於墨

子無見皆晏子春秋語也迺知宗元之辨有自而起

史通曰晏子虞卿呂氏陸賈其書篇第本無年月而亦謂春秋

### 子思二十三篇

隋唐志子思子七卷沈約謂禮記中庸表記坊記緇

衣皆取子思子

愚按坊記引論語曰三年無改於父之道可謂孝矣論語成於夫子之門

人則記所謂子云者非夫子之言也

文選注引子思子民以君爲心君

以民爲體又引詩云昔吾有先正其言明且清國家以寧都邑以成初學記引東戶季子之時道上鴈行

而不拾遺耕耜餘糧宿諸畝首

今有一卷乃取諸孔叢子非本書也



曾子十八篇

隋唐志二卷參與弟子公明儀樂正子春單居離曾元曾華之徒論述立身孝行之要天地萬物之理今十篇自脩身至天圓皆見於大戴禮

於篇第爲四十九至五十八

蓋後人摭出爲二卷朱文公曰世傳曾子書乃獨取大戴禮之十篇以充之其言語氣象視論孟檀弓等篇所載相去遠甚晁氏曰視漢亡八篇矣

漆彫子十二篇

孔子弟子漆彫啟後

韓非子曰孔子之後儒分爲八有子張氏子思氏顏

氏孟氏漆彫氏仲良氏公孫氏樂正氏之儒

史記列傳漆彫

開字子開蓋名啟字子開史記避景帝諱也論語注以開爲名著書者其後也

### 世子二十一篇

王充論衡本性篇周人世碩以爲人性有善有惡舉人之善性養而致之則善長惡性養而致之則惡長如此則性各有陰陽善惡在所養焉故世子作養書一篇宓子賤漆彫開公孫尼子之徒亦論性情與世

子相出入皆言性有善有惡

李克七篇

韓詩外傳說苑魏文侯問李克文選魏都賦注引李克書

公孫尼子二十八篇

隋唐志一卷似孔子弟子沈約謂樂記取公孫尼子劉瓛曰緇衣公孫尼子所作也馬摠意林引之

孟子十一篇

趙岐題辭著書七篇又有外書四篇性善辯文說孝  
經爲正其文不能弘深不與內篇相似志云十一篇  
并外書也外書今不傳論衡云孟子作性善之篇以  
爲人性皆善及其不善物亂之也謂人生於天地皆  
稟善性長大與物交接放縱悖亂不善日以生矣法  
言引孟子曰夫有意而不至者有矣未有無意而至  
者也說苑太平御覽引人皆知以食愈飢莫知以學  
愈愚人皆知糞其田而莫知糞其心顏氏家訓引圖

景失形劉知幾史通引堯舜不勝其美桀紂不勝其惡李善注文選引太山之高參天入雲史記六國表注皇甫謐曰孟子稱禹生石紐西夷人也漢伍被傳引孟子曰紂貴爲天子死曾不如匹夫是紂先自絕久矣非死之日天去之也藝文類聚引滕文公葬及惠子諫坊記注引舜年五十而不失其孺子之心皆外書也說文引孟子去齊澆浙而行諄諄而來孝子之心不若是忿二女嫫毘氏曰按此書韓愈以爲弟

子所會集非軻自作今考於軻之書則知愈之言非  
妄發也其書載孟子所見諸侯皆稱謚如齊宣王梁  
惠王梁襄王滕定公滕文公魯平公是也夫死然後  
有謚軻著書時所見諸侯不應皆死且惠王元年  
至平公之卒凡七十七年孟子見惠王王目之曰叟必  
已老矣決不見平公之卒也故予以愈言爲然

傳子云字

子與廣韻云字子居  
軻自著乃弟子共記其言與韓愈之說同

孫卿子三十三篇

當云三  
十二篇

劉向校讐書錄序云所校讐中孫卿書凡三百三十篇以相校除復重二百九十篇定著三十二篇皆以定殺青簡書可繕寫

勸學至賦篇

楊倞分易卷第更名

荀子韓文公曰荀卿之書語聖人必曰孔子子弓子弓之事業不傳惟太史公書弟子傳有駢臂子弓子弓受易於商瞿論語釋文引王弼注朱張字子弓荀卿以比孔子後山陳氏曰子弓者仲弓也唐氏曰向博極羣書序卿事大抵本司馬遷於遷書有三不合

春申君死當齊王建二十八年距宣王八十七年向  
言卿以宣王時來游學春申君死而卿廢設以宣王  
末年游齊年已百三十七矣遷書記孟子以惠王三  
十五年至梁當齊宣王七年惠王以叟稱孟子計亦  
五十餘後二十三年子之亂燕孟子在齊若卿來以  
宣王時不得如向言後孟子百餘歲田忌薦孫臏爲  
軍師敗魏桂陵當齊威王二十六年距趙孝成王七  
十八年臨武君與卿議兵於王前向以爲孫臏倖以



敗魏馬陵疑年馬陵去桂陵又十三年矣

芊子十八篇

名嬰齊人

史記阿之吁子索隱吁音半別錄作芊子徐廣云阿者今之東阿正義曰藝文志吁子十八篇顏師古音弭按是齊人阿又屬齊恐顏誤

內業十五篇

按管子有內業篇此書恐亦其類

周史六弢六篇

師古曰即今之六韜

莊子女商曰從說之則以金板六弢

釋文云本又作六韜謂文武虎

豹龍大

今六韜六卷六十篇尚書正義以爲後人所作

非實事也館閣書目謂周史六弢恐別是一書

通鑑外紀

云志在儒家非兵書也今六韜文王武王問太公兵戰之事其言鄙里煩雜不類太公之語蓋後人依托

爲唐氏曰春秋以前中國未有騎戰計必起於戰國

之時今六韜言其戰最詳決非太公所作當出於孫吳之後謀臣策士之所託也

寧越一篇

呂氏春秋寧越中年之鄙夫也苦耕稼之勞謂其友  
曰何爲而可以免此苦也其友曰莫如學學三十歲  
則可以達矣寧越曰請以十歲人將休吾將不敢休  
人將卧吾將不敢卧十五歲而周威公師之注威公  
西周君  
也志注公爲  
周威王師說苑引周威公問於寧子取士有道乎  
史記秦始皇紀賈生曰六國之士有寧越索隱云趙  
人徐廣云一作經越或自別有此人不必寧越

王孫子一篇

隋志梁有王孫子一卷馬總意林引之太平御覽引  
趙簡子獵於晉陽撫轡而歎楚莊王攻宋將軍子重

諫

藝文類聚引衛靈  
公坐重華之臺

董子一篇

名無心  
難墨子

隋志一卷論衡福虛篇儒家之徒董無心墨家之徒

纏子相見講道纏子稱墨家右鬼神是引秦穆公有

明德上帝賜之九年董子難以堯舜不賜年桀紂不

天死近而秦繆晉文言之夫繆者誤亂之名文者德

惠之表有誤亂之行天賜之年有德惠之操天奪其命乎按繆公之霸不過晉文晉文之謚美於繆公天不加晉文以命獨賜繆公以年是天報誤亂也館閣書目一卷與學墨者纏子辨上同兼愛上賢明鬼神

非纏子屈焉

吳祕注

徐子四十二篇

魏世家惠王三十年使龐涓將而令太子申爲上將軍過外黃外黃徐子謂太子曰臣有百戰百勝之術

太子曰可得聞乎客曰固願效之曰太子自將攻齊  
大勝并莒則富不過有魏貴不益爲王若戰不勝齊  
則萬世無魏矣此臣之百戰百勝之術也太子曰諾  
請必從公之言而還矣客曰太子雖欲還不得矣彼  
勸太子戰攻欲啖汁者衆太子雖欲還恐不得矣太  
子因欲還其御曰將出而還與北同太子果與齊人  
戰敗於馬陵齊虜魏太子申殺將軍涓遂大破魏  
劉向別錄

曰徐子外黃人也外黃時屬宋

魯仲連子十四篇

隋志五卷錄一卷春秋正義文選注太平御覽引之  
史記正義引魯連子云齊辯士田巴服徂丘議稷下  
毀五帝罪三王服五伯離堅白合同異一日服千人  
有徐刼者其弟子曰魯仲連年十二號千里駒往詣  
田巴曰臣聞堂上不糞郊草不芸白刃交前不救流  
矢急不暇緩也今楚軍南陽趙伐高唐燕人十萬聊  
城不去國亡在旦夕先生柰之何若不能者先生之

言有似梟鳴出城而人惡之願先生勿復言田巴曰  
謹聞命矣巴謂徐刼曰先生乃飛兔也豈直千里駒  
巴終身不談

虞氏春秋十五篇

十二諸侯年表序趙孝成王時其相虞卿上采春秋  
下觀近世亦著八篇爲虞氏春秋本傳云著書上采  
春秋下觀近世曰節義稱號揣摩政謀凡八篇以刺  
譏國家得失世傳之曰虞氏春秋

太史公曰虞卿非  
窮愁亦不能著書



以自見於後世史記志篇數不同當考

高祖傳十三篇

魏相傳奏明堂月令曰高皇帝所述書天子所服第

八隋志梁有漢高祖手詔一卷

陸賈二十三篇

本傳高帝曰爲我著秦所以失天下吾所以得之者及古成敗之國賈凡著十二篇每奏一篇未嘗不稱善稱其書曰新語太史公曰余讀陸生新語十二

篇固當世之辯士隋唐志二卷今存道基術事輔政  
無爲資賢至德懷慮七篇吳儔曰輔政篇曰書不必  
起於仲尼之門夫黜仲尼之書則道不尊矣烏能使  
高帝行儒術哉

孝文傳十一篇

史記文帝紀凡詔皆稱上曰以其出於帝之實意也  
賈誼五十八篇

本傳凡所著述五十八篇今新書十卷事勢連語雜

事凡五十八篇或取漢書誼傳附于後

隋志云賈子書本七十二

篇劉向  
刪定

昭帝始元五年詔曰通保傳傳文穎以爲賈

誼作今在大戴禮第四十八篇考之新書蓋以保傳  
傳職胎教容經四篇合爲一朱文公曰其言教太子  
輔少主之道與誼本傳疏語同當時以列於論語孝  
經尚書而進於君蓋已有識其言之要者矣顏師古  
曰誼上疏可爲太息者六今三而止蓋史取其切要  
者今考新書諸篇其末綴以痛哭者一流涕者二太

息者四其餘篇目或泛論事機而不屬於是三者如服疑益壤權重諸篇是也班固作傳分散其書參差不一總其大略自陛下誰憚而久不爲此已上則取

其書所謂宗首數寧藩傷藩強五美

壹動而五業附新書云五美

制不定親疎危亂凡七篇而爲之自天下之勢方病大腫以下以爲痛哭之說與其書合至於流涕二說其論足食勸農者是其一也而固載之食貨志不以爲流涕之說也論制匈奴其實一事凡有二篇其一

書以流涕其一則否是與前所謂足食勸農而爲二也固既去其一則以爲不足故又分解制匈奴二篇以爲流涕之二說庶人上僭體貌大臣皆其書所謂太息之說也固從而取之當矣而其書又有等齊篇論當時名分不正銅布篇論收銅鑄錢又皆其太息之說也固乃畧去等齊之篇不取而以銅布之篇附于食貨志顧取秦俗經制二篇其書不以爲太息者則以爲之

書經制制  
非皆全文

朱文公謂新書是平日記錄藁

草其中事事俱有

誼有經世之才

### 孔臧十篇

孔叢連叢子云臧歷位九卿遷御史大夫辭曰世以經學爲家乞爲太常與安國紀綱古訓遂拜太常禮賜如三公著書十篇先時常爲賦二十四篇四篇別不在集似其幼時之作也又爲書與從弟及戒子皆有義

朱文公曰孔叢子叙事至東漢然詞氣卑近亦非東漢人作所書孔臧禮賜如三公等事皆無

其實而通鑑誤信之所載臧兄弟往還書疏正類西京雜記偽造漢人文章

河間獻王對上下三雍宮三篇

本傳武帝時獻王來朝獻雅樂對三雍宮

應劭曰辟雍明堂靈

臺及詔策所問三十餘事其對推道術而言得事之

中文約指明後漢張純案河間古辟雍記具奏之說

苑引獻王之言司馬公曰獻王得周官左氏春秋毛

氏詩而立之周禮者周公之大典毛氏言詩最密左

氏與春秋相表裏三者不出六藝不明微獻王則六

藝其遂曠乎故其功烈至今賴之

五宗世家注漢名臣奏曰獻王朝被

服造次必於仁義問以  
五策獻王輒對無窮

### 董仲舒百二十三篇

本傳仲舒所著皆明經術之意及上疏條教凡百二  
十三篇而說春秋事得失間舉玉杯蕃露清明竹林  
之屬復數十篇十餘萬言後漢明德馬后尤善董仲舒  
書注云玉杯蕃露清明林竹之屬七錄隋唐志春秋  
繁露十七卷今八十二篇始楚莊王終天道施三篇  
闕又即用玉杯竹題題篇疑後人附著館閣書目案



逸周書王會天子南面立統無繁露注云繁露晷之所垂有聯貫之象春秋屬辭比事仲舒立名或取諸

此集一卷士不過賦答制策詣公孫弘記室其見於傳注者有救日食祝止雨書兩電對

鈎盾冗從李步昌八篇

百官表少府有鈎盾令丞注鈎盾主近苑囿枚臯傳與冗從爭注散職

鹽鐵論六十篇

車千秋傳贊鹽鐵議者起始元中六年二月徵文學賢良

問以治亂皆對願罷郡國鹽鐵酒榷均輸務本抑末  
毋與天下爭利然後教化可興御史大夫桑弘羊以爲  
此迺所以安邊竟制四夷國家大業不可廢也當時  
相詰難頗有其議又至宣帝時汝南桓寬次公治公  
羊春秋舉爲郎至廬江太守丞博通善屬文推衍鹽  
鐵之議增廣條目極其論難著數萬言亦欲以究治  
亂成一家之法焉今十卷本論第一至雜論第六十  
劉向所序新序

本傳采傳記行事者新序說苑凡五十篇奏之隋志  
新序三十卷說苑二十卷是也曾鞏校定十卷雜事  
至善謀陽朔元年二月癸卯二十卷缺史記商君傳  
上總一百八十三章注引新序論  
索隱曰新序是劉歆  
所撰蓋誤以向爲歆

說苑

向校中書說苑雜事分別次序除去與新序復重者

以類相從凡二十篇君道至反質七百八十四章

鴻嘉

四年三月  
己亥上

崇文總目存者五篇曾鞏復得十五篇與

舊爲二十篇李德裕云闕反質一卷輩分修文爲上下以足二十卷後高麗進一卷遂足

世說

未詳本傳著疾讒摘要救危及世頌凡八篇

古事悼已及同類也今其書不傳

列女傳頌圖

本傳向採取詩書所載賢妃正婦興國規條可法則及孽嬖亂亡者序次爲列女傳凡八篇以戒天子

傳七

篇頌義  
一篇

曾鞏序曰隋書及崇文總目皆十五篇曹大

家注以頌義考之蓋大家所注離其七篇爲十四與  
頌義凡十五篇而益以陳嬰母及東漢以來凡十六  
事非向書本然也蘓頌以頌義篇次復定其書爲八  
篇隋書以頌義爲劉歆作今驗頌義之文蓋同自叙  
又藝文志有頌圖明非歆作也王回序曰有母儀賢  
明仁智真慎節義辯通孽嬖等篇而各頌其義圖其  
狀總爲卒篇傳如太史公記頌如詩之四言而圖爲

屏風

頌云畫之屏風門侍郎歆所校列女傳種類相從爲七篇以著

劉向七畧別錄曰臣向與黃

禍福榮辱之效是非得失之分畫之於屏風四堵

以頌考之每篇皆十五傳

則凡無頌者宜皆非向所奏書不特自陳嬰母爲斷

也

自周郊婦至東漢梁嫗等以時次之別爲一篇

隋志又曰向作列仙列士

列女之傳列仙列士傳不著錄

揚雄所序 太玄十九

本傳玄三方九州二十七部八十一家二百四十三表  
七百二十九贊分爲三卷曰一二三有首衝錯測攤

瑩數文挽圖告十一篇皆以解剝玄體離散其文

首贊

測各爲卷范  
望散於注中

蕭該音義曰案別錄告下有玄問一篇

合十二篇今脫一篇司馬公說玄曰易與太玄大抵  
道同而法異易畫有二曰陽曰陰玄畫有三曰一曰  
二曰三易有六位玄有四重易以八卦相重爲六十  
四卦玄以一二三錯於方州部家爲八十一首易每  
卦有六爻合爲三百八十四爻玄每首有九贊合爲  
七百二十九贊皆當稽之日易有元亨利貞玄有罔

直蒙酋冥易大衍之數五十其用四十九玄天地之  
策各十有八合爲三十六策地則虛三用三十三  
策易揲之以四玄揲之以三易有七九八六謂之四  
象玄有一二三謂之三摹易有彖玄有首易有爻玄  
有贊易有象玄有測易有文言玄有文易有繫辭玄  
有攤瑩枕圖告易有說卦玄有數易有序卦玄有衝  
易有雜卦玄有錯殊塗而同歸百慮而一致皆本於  
太極兩儀三才四時五行而歸於道德仁誼禮也郭



亨疏云太玄潤色於君平

未知出何書

邵子曰玄之於易

猶地之於天也又曰揚雄作玄可謂見天地之心者

也張文饒曰玄紀日於牛宿者法日也紀氣於中首

者法天也以罔冥爲元則艮之終始萬物神妙之理

故太玄於三易實依連山而作也

七畧曰雄卒弟子侯芭角土作墳號

冢曰玄

### 法言十三

本傳以爲傳莫大於論語作法言胡氏曰論語乃孔

門弟子記諸善言誠有是人相與問答也法言則假  
借問答以則論語且又淺近特甚有不必問不必答  
不必言者晁氏曰法言稱谷口鄭樸子真蜀人李弘  
仲元與嚴君平蜀人聞之有願載名於法言者雄謝  
之雖林翁儒猶不得與也

樂四

未詳

雄有琴  
清英

歲二

本傳箴莫善於虞箴作州箴後漢胡廣傳揚雄依虞箴作十二州二十五官箴其九箴亡闕館閣書目二

十四箴一卷州箴十二衛尉等箴十二

又作酒箴見陳遵傳晁

氏曰雄見莽更易百官變置郡縣制度大亂士皆忘去節義以從諛取利乃作司空尚書光祿勳衛尉廷尉太僕司農大鴻臚將作大匠博士城門校尉上林苑令等箴及荆揚兗豫徐青幽冀并雍益交十二州箴皆勸人臣執忠守節可爲萬世戒言

於道最爲高

唐氏曰此自謂尊儒不知與九流並列已不是八家  
皆儒家之一偏一曲耳淇水李氏曰儒者之術教化  
仁義而已也使儒者在人主左右得以仁義教化爲  
天下之治則所謂道家者不過爲巖野居士名法家  
者不過爲賤有司陰陽者食于太史局而從橫雜墨  
之流或馳一傳或效一官農家者流耕王田奉國賦  
以樂天下之無事彼得與儒者相抗而爲流哉

漢藝文志考證卷五

欽定四庫全書

史部

漢藝文志考證卷六至

詳校官侍講學士臣法式善

編修臣程嘉謨覆勘

總校官檢討臣何思鈞

校對官編修臣莊通敏

謄錄監生臣潘尚基

欽定四庫全書

漢藝文志考證卷六

宋 王應麟 撰

道

伊尹五十一篇

說苑臣術篇呂氏春秋皆引伊尹對湯問

周書王會  
有伊尹朝

獻商愚謂孟子稱伊尹曰天<sub>之</sub>生此民也使先知覺

後知使先覺覺後覺也予天民之先覺者也予將以

斯道覺斯民也非子覺之而誰也伊尹所謂道豈老氏所謂道乎志於兵權謀省伊尹太公而入道家蓋戰國權謀之士著書而託之伊尹也湯誓序曰伊尹相湯伐桀升自陟孔安國謂出其不意豈知伊尹者哉傳伊尹之言者孟子一人而已

太公謀八十一篇言七十一篇兵八十五篇

李靖曰謀所謂陰謀不可以言窮言不可以兵窮兵不可以財窮此三門也齊世家後世之言兵及周之



陰權皆宗太公為本謀

戰國策蘓秦得太公陰符之謀隋志有太公陰謀

文

選注引七畧太公金版玉匱

雖近世之文然多善

者

又引太公金匱太史公序齊世家曰謬權於幽正義謂六韜三畧陰符七術之屬

愚謂老

氏曰將欲翕之必固張之將欲奪之必固與之此陰

謀之言也范蠡用之以取吳張良本之以滅項而言

兵者尚焉此太史公入道家然陰謀之術申商韓非

之所本也文王之德之純太公見而知之丹書敬義

之訓武王得於師尚父陰謀傾商之說陋矣

辛甲二十九篇

劉向別錄曰辛甲故殷之臣事紂蓋七十五諫而不聽去至周召公與語賢之告文王文王親自迎之以為公卿封長子左氏傳辛甲為太史命百官官箴王闕

鬻子二十二篇

太史公序楚世家曰重黎業之吳回接之殷之季世鬻子牒之劉向別錄云鬻子名熊封於楚劉勰曰鬻

熊知道而文王咨謀諸子肇始莫先於斯唐逢行珪

注一卷十四篇

序云卷軸不全而其門可見

賈誼新書引文王武

王成王問粥子列子天瑞篇引粥熊曰運轉無已天

地密移疇覺之哉力命篇引粥熊語文王曰自長非

所增自短非所損

陸佃曰列子所稱即南華藏舟龜鶴之義也今其書無之則熊之嘉

言要旨亡者多矣

又小說有鬻子說十九篇後世所加

### 管子八十六篇

劉向序所校讎中管子書大中大夫卜圭書臣富參

書射聲校尉立書太史書凡中外書五百六十四以  
校除復重四百八十四篇定著八十六篇太史公曰  
余讀管氏牧民山高乘馬輕重九府詳哉言之也九  
府書民間無有山高一名形勢

今二十四卷牧  
民至輕重庚

傳子

曰管子書過半是後之好事者所加輕重篇尤鄙俗  
今本房喬注唐志謂尹知章注文選引江邃文釋云  
管子曰夫士懷耿介之心不蔭惡木之枝今檢管子  
近亡數篇恐是亡篇之內而遽見之

石林葉氏曰其  
間頗多與鬼谷

子相亂管子自序其事亦泛濫不切疑皆戰國策士  
相附益燕氏古史謂多申韓之言非管子之正也甚  
者以智欺其民以術傾隣國有不貴之實石  
壁菁茅之謀使管仲而信然尚何以霸哉

# 老子

隋志梁有漢長陵三老毋丘望之注老子二卷志不  
著錄晁氏公武曰以周平王四十二年授闕尹喜凡  
五千七百四十有八言八十一章言道德之旨其末  
云使民復結繩而用之蓋三皇之道也東萊呂氏曰  
孔子嘗問禮焉今載於曾子問者與五千言殊不類

蓋告孔子者其所職著於書者自其所見也陸德明序錄云周敬王時西出闕為闕令尹喜說道德二篇尚虛無無為漢文帝時河上公作章句四篇以授帝

言治身治國之要

志無河工公章句鄰氏傅氏徐氏劉向傳說今皆亡王禹玉曰今

資善堂所寫御本獨無章名章名疑非老氏之意

薛氏曰古文老子道德上

下經無八十一章之辨今文有河上公注分八十一章史記樂臣公本師河上丈人教安期再傳至于臣公其弟子蓋公為曹相國師脩黃帝老子學則丈人

者乃今所謂河上公也自晉世已言其教漢文帝叙  
述尤怪誕景迂晁氏曰常善救人故無棄人常善救  
物故無棄物獨得諸河上公古本無有也傳夾能辨  
之王弼題曰道德經不析道德而上下之猶近古歟

葉氏曰老子之書其與孔子異者  
皆矯世之辭而所同者皆合於易

老子指歸

不著錄

隋志十一卷嚴遵撰列子釋文云遵字君平作指歸  
十四篇演解五千文

文子九篇

與孔子並時而稱周平王間似依託

今本十二篇道原至上禮李暹注豈暹析之與其傳  
曰姓辛氏葵丘濮工人號曰計然范蠡師事之本受  
業於老子文子錄其遺言為十二篇名研文子其字  
也志注謂似依託晁氏曰三代之書經秦火之後幸  
而存者錯亂參差如爾雅周公作而有張仲孝友是  
也柳宗元以為駁書曹子建表引文子李善註以為  
計然今其書一以老子為宗略無與范蠡謀議之事



貨殖傳注計然其書則有萬物錄著五方所出皆述  
之事見皇覽及晉中經簿唐志農家范子計然十五  
卷注云范蠡問計然荅則與文子了不同北史蕭大  
圜曰陶朱成術於辛文

蛸子十三篇

名淵楚人

史記環淵楚人學黃老道德之術著上下篇

廣韻古有楚賢

者環淵索隱正義皆無注釋今按文選枚乘七發便蛸

詹何之倫注云淮南子雖有鈎鉞芳餌加以詹何蛸

螺之數猶不能與罔罟爭得也宋玉與登徒子偕受釣於玄淵七畧蚘子名淵三文雖殊其人一也

關尹子九篇

劉向校中秘書九篇

太常存七篇臣向本九篇

蓋公授曹相國參

相國薨書葬至孝武時有方士來以七篇上上以僂處之淮南王安好道聚書有此不出臣向父德因治

淮南王事得之

永始二年八月庚子上

一字二柱三極四符五

鑑六七七釜八籌九藥列仙傳云著書九篇名闕令

子

莊子五十二篇

郭象注三十三篇內篇七外篇十五雜篇十一陸德  
明序錄云莊生宏才命世辭趣華深正言若反故莫  
能暢其弘致後人增足漸失其真故郭子玄云一曲  
之才妄竄奇說若關奕意脩之首危言游鬼子胥之  
篇凡諸巧襍十分有三藝文志五十二篇即司馬彪  
孟氏所注是也

內篇七外篇二十八  
雜篇十四解說三

言多詭誕或似

山海經或類占夢書故注者以意去取其內篇衆家  
並同自餘或有外而無襍唯子玄所注特會莊生之

旨

成玄英疏莊  
周字子休

文選注太平御覽引莊子閑奕游鳧

之語荀子曰莊子蔽於天而不知人朱文公曰莊子  
見道體蓋自孟子之後荀卿諸公皆不能及韓文公  
曰子夏之學其後有田子方子方之後流而為莊周

故周之書喜稱  
子方之為人

列子八篇

劉向校中書列子五篇與長社尉臣參校讎太常書

三篇太史書四篇臣向書六篇臣參書二篇內外書

凡二十篇以校除復重十二篇定著八篇

天瑞至

穆

王湯問二篇迂誕恢詭非君子之言也至於力命篇

一推分命揚子之書唯貴放逸二義乖背不似一家

之書

永始三年八月壬寅上

柳宗元曰劉向錄列子曰鄭穆公

時人穆公在孔子前幾百歲列子書言子產鄧析史

記鄭繻公二十四年鄭殺其相駟子陽子陽正與列

子同時是歲魯穆公十年不知何言魯穆公時遂誤  
為鄭耶莊周放依其辭其稱夏竦狙公紀消子季咸  
等皆出列子其文辭類莊子而尤質厚其揚朱力命  
疑其揚子書其言魏年孔穿皆出列子後不可信

或謂

鄭繻公字  
誤為繆公

東萊呂氏曰以列子所載揚朱遇老子老

子中道而歎一章觀之則朱受學於老子不疑朱之  
言見於列子者因多後人所附益為我之說亦畧可  
見也石林葉氏曰天瑞黃帝篇與佛書相表裏呂氏

曰列子多引黃帝書蓋古之微言傳久而差者玄牝一章今見老子此戰國秦漢所以並言黃老也

老成子十八篇

列子曰老成子學幻於尹文先生

長廬子九篇

史記楚有尸子長廬

公子牟四篇

先莊子

荀子非十二子注魏牟魏公子封於中山今莊子有

公子年稱莊子之言以折公孫龍據即與莊子同時也又列子稱公子年解公孫龍之言龍平原君之客而張湛以為文侯子據年代非也說苑公子年東行穰侯送之未知何者為定

田子二十五篇

呂氏春秋曰老聃貴柔孔子貴仁墨翟貴廉闕尹貴清子列子貴虛陳駢貴齊陽朱貴已孫臏貴勢王廖貴先兒良貴後尸子廣澤篇曰墨子貴兼孔子貴公



皇子貴哀田子貴均列子貴虛料子貴別史記世家  
齊宣王喜文學游說之士自如騶衍淳于髡田駢接  
子慎到環淵之徒七十六人皆賜列第為上大夫不  
治而議論是以齊稷下學士復盛且數百千人劉向  
別錄曰稷齊城門名談說之士期會於稷門下故曰  
稷下鄭志張逸問云我先師棘下生何時人荅云齊  
田氏時善學者所會處也齊人號之棘下生無常人  
也西山真氏曰莊生所述諸子墨翟禽滑釐其一也

宋鉞尹文其二也彭蒙田駢慎到其三也關尹老聃

其四也莊周其五也惠施其六也異端之盛莫甚於

此時

陳駢即田駢也荀子非十二子與慎到並言

七畧齊田駢好談論故

齊人為語曰天口駢

天口者言田駢子不可窮其口若事天荀子注其學本黃老歸

名法

老萊子十六篇

史記老萊子亦楚人也著書十五篇言道家之用與

孔子同時大戴禮云德恭而行信終日言不在悔尤

之內貧而能樂蓋老萊子之行也

文選注引尸子老萊子曰人生於天

地之間

戰國策云不聞老萊子之教孔子事君乎示

之其齒之堅也六十而盡相靡也

### 鵽冠子一篇

今四卷十五篇

隋志三卷

博選至學問柳宗元辨此書非

古謂好事者偽為其書而韓愈獨稱焉謂其詞襍黃

老刑名

陸佃序曰自博選篇至武靈王問凡十有九篇而退之讀此云有六篇者非全書也今四

篇亡

真隱傳以鵽為

冠莫測其名因服成號

黃帝四經四篇黃帝銘六經篇

史記正義黃帝道書十卷隋志漢時道書之流三十

七家大旨皆去健美處沖虛其黃帝四篇老子二篇

最得深旨

黃帝老子之書謂之黃老列子引黃帝書呂氏春秋引黃帝言又曰嘗得學黃帝之

所以誨顓頊矣賈誼淮南子引黃帝曰

朱文公曰黃帝聰明神聖得之

於天天下之理無不知天下之事無不能上而天地  
陰陽造化發育之原下而保神練氣愈疾引年之術  
庶物萬事之理巨細精粗洞然於胸次是以具言有

及之者而世之言此者因自託焉以信其說於後世  
至戰國時方術之士遂筆之書以相傳授如列子所  
引與素問握奇之屬蓋必有粗得遺言之彷彿者如  
許行所道神農之言耳周官外史所掌三皇五帝之  
書恐不但若此而已東萊呂氏曰漢初黃老世有傳  
授觀樂毅傳贊可考皇覽記陰謀黃帝金人器銘武  
王問尚父曰五帝之誠可得聞歟尚父曰黃帝之戒  
曰吾之居民上也搖搖恐夕不至朝故為金人三封

欽定四庫全書

卷六

其口曰古之慎言

金人銘蓋六篇之一也亦見家語

蔡邕論黃帝有

中機之法皇王大紀曰黃帝作輿几之箴以警宴安  
作金几之銘以戒逸欲黃帝內傳一卷序云錢鏐得  
之於衡山石室中至劉向校書見之遂傳于世

捷子二篇

齊人武帝時說

史記接子齊人與慎到田駢同時皆學黃老

正義藝文志云

接子此云武帝時說當考

三輔決錄有接昕子

鄭長者二篇

袁淑真隱傳鄭長者隱德無名著書一篇言道家事  
韓非稱之世傳是長者之辭因以為名今按韓非子  
外儲說鄭長者有言曰夫虛靜無為而無見也

素王妙論

不著錄

太史公素王妙論曰諸稱富者非貴其身得志也乃  
貴恩覆子孫澤及鄉里也黃帝設五法布之天下用  
之無窮蓋世有能知者莫不尊親如范子可謂曉之  
矣管子設輕重九府行伊尹之術則桓公以霸范蠡

行十術之計二十一年之間三致千萬再散與貧七  
畧云司馬遷撰史記正義云二卷今僅見此語於太  
平御覽

越世家注引云  
范蠡本南陽人

隋志梁有太史公素王妙議

二卷

道家者流

致堂胡氏曰道以天下共由而得名得道而盡惟堯  
舜文王孔子而已黃帝之書無傳老聃八十一篇  
之孔孟固難以大成歸之自其所見而立言不可與



天下共由也獨善其身不可與天下共由而名之曰

道此漢以來淺儒之論以啟後世枝流分裂之弊

陳平

曰我多陰謀是道家之所禁太史公曰平少時本好黃帝老子之術

太史公習道論六

家要旨言道家為長

陰陽

鄒子四十九篇鄒子終始五十六篇

史記鄒衍深觀陰陽消息而作怪迂之變終始大聖

之篇十餘萬言其語闕大不經

云云

燕昭王身親往

師之作主運

劉向別錄云鄒子書有主運篇

封禪書云自齊威宣之

時鄒子之徒論著終始五德之運

如淳曰今其書有五德始終五德各

以所勝為行

及秦帝而齊人奏之故始皇采用之又云鄒

衍以陰陽主運顯於諸侯

如淳曰今其書有主運五行相次轉用事隨方面為

服公孫臣上書曰推終始傳則漢當土德

鹽鐵論及論衡並以

衍言迂怪虛妄

東萊呂氏曰方騶衍推五德之運人視之特

陰陽末術耳若無預於治亂之數也及至始皇始采

用之定為水德以為水德之治剛毅戾深事皆決於

法刻削無仁恩和義然後合五德之數於是急法久  
者不赦則其所繫豈小哉

周禮司燿注鄭  
司農引鄒子

南公三十一篇

史記項羽紀楚南宮曰楚雖三戶亡秦必楚也正義  
虞喜志林云南公者道士識廢興之數知亡秦者必  
於楚徐廣曰楚人也善言陰陽真隱傳居國南鄙因  
以為號著書言陰陽事

容成子十四篇

呂氏春秋容成作歷莊子則陽篇容成氏曰除日无  
歲无内无外

張蒼十六篇

本傳蒼尤邃律歷著書十八篇言陰陽律歷事

志篇數不

同

鄒爽子十二篇

七畧曰鄒赫子齊人為之語曰彫龍赫赫言鄒衍之術文飾之若彫鏤龍文

史記云頗采騶衍之術以紀文衍之術迂大而閼辨

爽也文具難施

五曹官制五篇

漢制似賈誼所條

賈誼傳誼以為宜當改正朔易服色制度定官名興禮樂廼草具其儀法色上黃數用五為官名悉更奏之

公孫渾邪十五篇

公孫賀傳祖父昆邪景帝時封平曲侯著書十餘篇

法

李子三十二篇

食貨志李悝為魏文侯作盡地力之教

史記魏有李悝盡地力之

教晉刑法志魏文志師李悝撰次諸國法著法經國戰

策魏安陵君曰吾先君成侯受詔襄王以守此地也手受大府之憲憲之上篇曰子弑父臣弑君有常不赦國雖大赦降城亡子不得與焉張斐律序鄭鑄刑書晉作執秩趙

制國律楚造僕區並述法律之名申韓之徒各自立

制通鑑外紀李悝為上地守下令曰人有狐疑之訟今射的中者勝不中者負令下而人皆習射及與

秦人戰大敗之

商君二十九篇

太史公曰嘗讀商君開塞耕戰書與其人行事相類  
正義云商君書五卷館閣書目今是書具存共二十  
六篇三篇後魏刑罰志商君以法經六篇入說於秦  
設參夷之誅連相坐之法

申子六篇

史記申不害傳申子之學本於黃老而主刑名著書  
二篇號申子注劉向別錄曰今民間所有上下二篇

中書六篇皆合二篇已備過太史公所記元帝紀注  
劉向別錄云申子學號刑名刑名者以名責實尊君  
卑臣崇上抑下宣帝好觀其君臣篇唐志三卷崇文  
總目館閣書目皆缺荀子曰申子蔽於勢而不知知  
韓非子曰申不害徒術而無法公孫鞅徒法而無術  
淮南子曰商鞅之啟塞申子之三符 七畧曰孝宣  
皇帝重申不害君臣篇使黃門郎張子喬正其字

處子九篇

史記趙有劇子之言注徐廣曰按應劭氏姓注云處



處子索隱曰前史不記其名

風俗通漢有北海太守處興蓋處子之後史記正義

趙有劇孟劇辛是有劇姓

### 慎子四十二篇

史記慎到趙人著十二論正義慎子十卷戰國時處

士館閣書目一卷案漢志四十二篇今三十七篇亡

唯有威德因循民稭德立君人五篇滕輔注

荀子曰慎子蔽

於法而不知賢又曰慎子有見於後無見於先史記注徐廣曰劉向所定有四十一篇

荀子注

其術本黃老歸刑名多明不尚賢不使能之道

太平御覽

欽定四庫全書

刑名及法考證  
卷六

引慎于昔者天子手能衣而宰夫設服足能行而相者導進口能言而行人稱辭諺云不聰不明不能為王不替不聾不能為公皆在亡篇

韓子五十五篇

史記韓非傳喜刑名法術之學而其歸本於黃老作孤憤五蠹內外儲說林說難十餘萬言注新序曰申子書號曰術商鞅書號曰法皆曰刑名東萊呂氏曰太史公謂非喜刑名法術之學則兼治之也索隱按韓子書有解老喻老二篇是亦崇黃老之學也今本

二十卷五十六篇沙隨程氏曰非書有存韓篇故李斯言非終為韓不為秦也後人誤以范曄書廁于具書之間乃有舉韓之論通鑑謂非欲獲宗國則非也

韓安國受韓  
子襍家說

晁錯三十一篇

錯學申商刑名於軹張恢生所與洛陽宋孟及劉滂同師呂氏曰申商之學亦世有傳授唐志晁氏新書七卷隋志梁有三卷文選賓戲注引朝錯新書太史

公曰賈生晁錯明申商

蘇氏曰錯不足道也而詎亦為之

漢律

不著錄

晉刑法志秦漢舊律其文起自魏文侯師李悝撰次  
諸國法著法經以為王者之政莫急於盜賊故其律  
始於盜賊須劾捕故著網捕二篇其輕狡越城博戲  
借假不廉淫侈踰制為襍律一篇又以具律具其加  
減是故所著六篇而已然皆罪名之制也

唐六典注李悝集諸

國刑書造法經六篇一盜法二賊法三囚法四捕法  
五襍法六具法商鞅傳之改法為律呂氏曰具律令

之名例律也商君受之以相秦漢承秦制蕭何定律除參

夷連坐之罪增部主見知之條益事律興廐戶三篇

呂氏曰三篇合為九篇叔孫通益律所不及傍章十摠謂之事律

八篇張湯越宮律二十七篇趙禹朝律六篇合六十

篇隋志漢律久亡上計律周禮典路注大樂律大胥注尉律說文叙昭帝紀

注田律周禮士師注耐金律丁孚漢儀漢律會稽獻毅禮記內則注

會稽郡獻鮑醬會稽獻鮑一斗祠祀司命能捕豺豕

購百錢婦告威姑祠宗廟丹書告民不繇貲錢二十

二綺絲數謂之紕布謂之總綬組謂之首畤田蓀草  
及其門首灑漑賜衣者縵裘白裏舩方長為舩臚齊

人予妻婢姦曰姘見姘變不得侍祠

說文

吏五日得一

下沐

初學記

列侯墳高四丈關內侯以下至庶人各有

差

周禮冢人注

賊律曰敢盜人及教令者棄市

周禮庶民注

掠

者唯得榜笞立

章帝紀

與罪人交關三日已上皆應知

情

孔融傳

三人以上無故羣飲罰金四兩

漢書文帝紀注

吏二

千石有予告有賜告

高帝紀注

人出一算

惠帝紀注

無故入人

室宅廬舍上人車船牽引欲犯法者其時格殺之無

罪

周禮朝士注疏云賊律

無干車無自後射

大司馬注疏云田律

淫季父

之妻白報

左傳注

闔以刃傷人完為城旦其賊加罪一

等與謀者同罪

薛宣傳

郭躬父弘習小杜律

延年惠帝四

年除挾書律文帝元年除收柁相坐律令二年除誹

謗律

愚按律令載於理官故志不著錄陶謨虞始造律傳子曰律是咎繇遺訓

風俗通咎繇漢命蕭

何廣

之

漢令不著錄

晉刑法志漢時決事集為令甲以下三百餘篇 令

甲死者不可復生刑者不可復息宣帝紀 令甲諸侯在

國名田他縣罰金二兩哀帝紀 令甲女子犯罪作如徒

六月顧山遣歸平帝紀 金布令甲曰邊郡數被兵離饑

寒天絕天年父子相失令天下共給其賞蕭望之傳 令甲

第一常符漏品後漢歷志 著于甲令而稱忠吳芮傳 乙令蹕

先至而犯者罰金四兩張釋之傳 令乙騎乘車馬行馳

道中沒入車馬江充傳 令丙簞長短有數黃帝紀 秩祿令



史記呂后紀注文帝紀官衛令張釋之傳注金布令見上高帝紀注後漢禮儀志

注品令百官表注祠令文帝紀注祀令後漢祭祀志注齋令蔡邕表志公令

何並功令儒林傳序廷尉挈令張湯傳光祿挈令燕王旦傳注樂

浪挈令說文廷尉板令應劭傳田令黃香傳水令兒寬傳漢令

趣張百人蠻夷長有罪當殊之蠻夷卒有頽說文安帝

元初五年詔曰舊令制度各有科品注漢令今亡成帝詔

曰今大辟之刑十有餘條律令煩多百有餘萬言杜周

曰前王所是著為律後王所是疏為令鹽鐵論文學曰今律令百有餘

篇陳寵謂今律令死刑六百一十耐罪一千六百九

十八贖罪以下二千六百八十一溢於甫刑者千九

百八十九

刑法志孝武禁罔寢密律令凡三百五十九章

鄭昌以刪定律令

為正本班固以刪定律令為清原

杜預律序曰律以正罪名令以存事

制

法家者流蓋出於理官

范氏曰申韓本於老子李斯出於荀卿學者失其淵

源其末流將無所不至朱文公曰申韓之學淺於楊

墨東萊呂氏曰六經孔孟子之教與人之公心合故  
治世宗之申商韓非之說與人之私情合故末世宗  
之兼山黃氏曰九家之學今存者獨刑名家而止耳  
佛老氏而止耳高者喜談佛老而下者或習刑名故  
兩家之說獨存於世秦梁至於敗亡蘓氏曰自漢以  
來學者雖鄙申韓不取然世主心悅其言而陰用之  
小人之欲得君者必私習其說或誦言稱舉之故其  
學至于今猶行也

明罰飭法

飭今易作勅後魏刑法志漢孝武世增律三十餘篇  
宣帝時于定國為廷尉集諸法律凡九百六十卷大  
辟四百九十條千八百八十二事死罪決北凡三千  
四百七十二條諸斷罪當用者合二萬六千二百七

十二條

張斐律序曰張湯制趙官律趙禹作朝會正  
見律 鹽鐵論曰二尺四寸之律古今一也

杜周傳三尺法朱

博傳三尺律令

漢藝文志考證卷六

欽定四庫全書

漢藝文志考證卷七

宋 王應麟 撰

名

鄧析二篇

劉向序臣所校讎中鄧析書四篇臣叙書一篇凡中外書五篇以相校除復重為二篇子產卒後二十年而鄧析死傳或稱子產誅鄧析非也其論無厚者言

之異同與公孫龍同類隋志一卷

無厚轉解二篇韓非子曰堅白無厚

之辭章而憲今之法息

晁氏曰析之學蓋兼名法家今其書大

旨訐而刻真其言也其間時勦取他書頗駁謀不倫

豈後人附益之與荀子非十二子與惠施並言

左傳鄭

顯殺鄧析而用其竹刑淮南鴻烈曰鄧析巧辯而亂法

尹文子一篇

莊子天下篇云宋鉅尹文其為人太多其自為太少  
魏黃初末山陽仲長氏得其書始詮次為上下二篇

李獻臣云仲  
長氏純也

晁氏曰序稱當齊宣王時居稷下學於

公孫龍龍稱之而志叙此書在龍書上顏師古謂文  
嘗說齊宣王在龍之前史記云公孫龍客于平原君  
君相趙惠文王惠文王元年齊宣沒已四十餘歲矣  
則知文非學于龍者也今觀其書雖專言刑名然亦  
宗六藝數稱仲尼其叛道者蓋鮮豈若龍之不宗賢  
聖好怪妄言哉洪氏曰劉歆云其學本於黃老今其  
文僅五千言亦非純本黃老者頗流而入於兼愛隋志

二卷周之處士遊齊稷下

公孫龍子十四篇

史記趙有公孫龍為堅白同異之辯

志毛公九篇趙人與公孫龍等

並遊平原君趙勝家索隱謂龍即仲尼弟子非也

列子釋文龍字子秉趙人

莊子謂惠子曰儒墨楊秉四與夫子為五果孰是邪

揚揚朱也秉公孫龍也晉太康地記云汝南西平縣

有龍淵水可用淬刀劍特堅利故有堅白之論云黃

所以為堅也白所以為利也或辯之曰白所以為不



堅黃所以為不利

司馬彪曰堅白謂堅石非石白馬非馬也同異謂使異者同同者異

呂氏春秋云孔穿公孫龍相與論於平原君所深而辯至於藏三牙公孫龍言藏之三牙甚辯孔穿不應少選辭而出明日孔穿朝平原君謂孔穿曰昔有公孫之言甚辯孔穿曰然幾能令藏三牙矣雖然難願得有問於君謂藏三牙甚難而實非也謂藏兩牙甚易而實是也不知君將從易而是也者乎將從難而非者乎平原君不應明日謂公孫龍曰公無與孔穿

辯淮南鴻烈曰公孫龍繁於辭而實名楊子曰公孫龍詭辭數萬東萊呂氏曰告子彼長而我長之彼白而我白之斯言也蓋堅白同異之祖孟子累章辯析歷舉玉雪羽馬人五白之說借其矛而伐之而其技

窮

唐志三卷  
今一卷

### 惠子一篇

莊子天下篇惠施多方其書五車其道舛駁其言也不中荀子曰惠子蔽於辭而不知實

莊子德充符天選子之形子以

堅白  
鳴

孔子曰必也正名乎

尹文子曰形以定名名以定事事以驗名察其所以然則形名之與事無所隱其理矣名有三科一曰命物之名方圓白黑是也二曰毀譽之名善惡貴賤是也三曰況謂之名賢愚愛憎是也

墨

尹佚二篇

左傳稱史佚有言史佚之志晉語胥臣曰文王訪於  
辛尹注辛甲尹佚皆周大史洛誥逸祝冊正義以為  
史佚淮南鴻烈引成王問政於尹佚保傅傳丞立於  
後是史佚也說苑引成王問政於尹逸尹佚周史也  
而為墨家之首今書亡不可考按呂氏春秋魯惠公  
使宰讓請郊廟之禮於天子天子使史角往惠公止  
之其後在於魯墨子學焉意者史角之後託於佚歟

田球子三篇

文選注太平御覽引之隋志梁有一卷

謂少昊鞮鞮  
毛人獻羽裘

赤鷩集戶遺其丹書夏禹渠搜人  
獻珍裘堯冀英成歷獬豸毛為帳

隨巢子六篇 胡非子三篇

隋唐志各一卷洪氏曰二書今不復存馬摠意林所述隨巢兼愛明鬼而墨之徒可知胡非言勇有五等其說亦卑陋無過人處藝文類聚引隨巢子曰昔三苗大亂天命夏禹於玄宮有大神人面鳥身降而福之司祿益食而民不饑司金益富而國家實司命益

年而民不夭四方歸之禹乃克三苗而神民不違

禹

於崐石啟  
生於石

史記索隱引隨巢子云夷羊在牧飛拾滿

野天鬼不顧亦不賓滅太平御覽引昔三苗大亂龍生  
于廟犬哭于市天賜武王黃鳥之旗以代殷愚謂此  
即墨氏之明鬼也

墨子七十一篇

館閣書目十五卷自親士至禡守為七十一篇亡節

用節葬明鬼非樂非儒等九篇

一本自親士至禡守  
為七十一篇所存六

十一篇且多說脫不相聯屬又一本止存一十三篇  
晁氏曰荀孟皆非之而韓愈獨謂辯生於末學非二  
師之道本然也韓非子曰有相里氏相夫氏鄧陵氏  
之墨墨離為三荀子曰墨子有有於齊無見於時又  
曰墨子藏於用而不知文晉魯勝注墨辯其叙曰墨子著書作辯

經以立名本惠施公孫龍祖述其學以正刑名顯於  
世墨辯有上下經經各有說凡四篇與其書衆篇連  
第故獨存史記云墨翟宋之大夫善守禦為節用或  
曰並孔子時或曰在其後索隱曰按別錄云墨子書  
有文子文子子夏之弟子問於墨子如此則墨子在

七十子之後莊子天下篇云相里勤之弟子五侯之徒南方之墨者苦獲已齒鄧陵子之屬俱誦墨經而倍謫不同相謂別墨又云以巨子為聖人皆願為之尸呂氏春秋墨者有鉅子腹蘄居秦墨者鉅子孟勝善荆之陽城君孟勝曰我將屬鉅子於宋之田襄子此即莊子所謂巨子也

從橫

蘓子三十二篇



鬼谷子三卷樂壹注云蘓秦欲神秘其道故假名鬼谷也史記正義戰國策云乃發書陳篋數十得太公陰符之謀伏而誦之簡練以為揣摩鬼谷子有陰符七術有揣及摩二篇乃蘓秦書明矣東萊呂氏曰戰國游說之風蘓秦張儀公孫衍實倡之秦周人也儀與衍皆魏人也故言權變辯智之士必曰三晉兩周云石林葉氏曰蘓秦學出於揣摩未嘗卓然有志天下反覆無常不守一道度其隙苟可入者則為之此

揣摩之術也故始求說周周顯王不能用則去而之  
秦再求說秦秦孝公不能用則去而之燕幸燕文侯  
適合而從說行其所以說周者吾不能知若秦孝公  
而聽之則必先為衡說以噬六國何有於周此蘇秦

所以取死也

太平御覽引蘇子曰天子坐九重之內  
樹塞其門旅以翳明衡以隱聽鸞以抑

馳後漢王符傳注引蘇子曰人生一世若朝露之宅  
於桐葉耳其與幾何佛覽又引蘭以芳自燒膏以

肥自燭翠以羽殃  
身蚌以珠致破

鬼谷子 不著錄

晁氏曰按史記戰國時隱居潁川陽城之鬼谷因以  
自號長於養性治身蘓秦張儀師之受縱橫之事尹  
知章叙謂此書即授秦儀者捫闔之術十三章一云  
十二

章本經持樞中經三篇

一云受轉九  
脞筮三章

秦儀復往見先

生乃正席而坐嚴顏而言告二子以全身之道梁陶  
弘景注柳子厚嘗曰劉向班固錄書無鬼谷子鬼谷  
子後出而嶮蘊峭薄恐其言妄亂世難信尤者晚乃  
益出七術怪謬異甚言益隘使人猖狂失守來鵠亦

曰鬼谷子昔教人詭詭訥訥揣測險滑之術悉備於  
章學之者惟儀秦而已始捭闔飛箱實今之常態是知  
漸漓之後不讀鬼谷子書者其行事皆得自然符契  
也昔蒼頡作文字鬼為之哭不知鬼谷作是書鬼何  
為耶世人欲知鬼谷子者觀二子言略盡矣劉氏涇  
曰老之翕張儒之闔闢其與鬼谷往來如環鬼幽而  
顯者也谷扣而應者也藏幽露顯一扣一應信如其  
名哉

說苑引鬼谷子曰人之不善而能矯之者難矣

關子一篇

太平御覽引關子云任公子冬羅鯉於山阿又云吳章莊吉之調又云魯人有好釣者以桂為餌黃金為鈎垂翡翠之綸藝文類聚引關子云宋景公使弓工為弓九年來見云云其餘力逸勁飲羽於石梁又云宋之愚人得燕石於梧臺之東歸而藏之以為寶

崩子一篇

崩通傳論戰國時說士權變亦自序其說凡八十一

首號曰雋永

史記通善為長短說論戰國之權變為八十一首

主父偃二十八篇

說苑引主父偃曰人而無辭安所用之昔子產脩其辭而趙武致其敬王孫滿明其言而楚莊以慙

縱橫

東萊呂氏曰連關中之謂橫合關東之謂縱胡氏曰秦合六國從儀以秦衡不再歲其約皆解蘓氏曰二者皆出於權譎而從為愈葉氏曰從人之與衡人相

去遠矣太史公言張儀之惡甚於蘓秦

韓非子曰從者合衆強以

攻一弱也而衡者事一強以攻衆弱也皆非所以持國也周去秦為從昔年而舉衡離魏為衡半歲而亡是周滅於從衡亡於衡也

禡

### 孔甲盤孟二十六篇

田蚡傳學盤孟諸書注應劭曰黃帝史孔甲所作也

大選注七畧曰盤孟書者其傳言孔甲為之孔甲書黃帝之史也書盤孟中為誠法或於鼎名曰銘

盤孟中所以為法戒孟康曰禡家書兼儒墨名法蔡

邕銘論黃帝有巾機之法孔甲有槃杆之誠梁簡文帝云盤孟寓殷高之辭

大命三十七篇

賈誼書脩政語引大禹曰民無食也則我弗能使也功成而不利於民我弗能勸也

太史公大宛傳云禹本紀言河出崑崙

尉繚二十九篇

兵形勢又有尉繚三十一篇隋志尉繚子五卷今二十四篇天官至兵令言刑政兵戰之事其文意有附



會者首篇稱梁惠王問意者魏人與秦始皇紀大梁人尉繚來說秦王

# 尸子二十篇

史記楚有尸子注劉向別錄楚有尸子疑謂其在蜀  
今案尸子書晉人也名佼秦相衛鞅客也衛鞅商君  
謀事畫計立法理民未嘗不與佼規也商君被刑佼  
恐并誅乃亡逃入蜀造二十篇書凡六萬餘言後漢  
書注尸佼作書二十篇內十九篇陳道德仁義之紀  
內一篇言九州險阻水泉所起

呂強上疏引尸子曰  
君如行民如水行方

則水方行隋志二十卷其九篇亡魏黃初中續李淑

書目

存四卷館閣書目止

存二篇合為一卷爾雅疏引廣澤仁意緯子篇宋

書禮志引禹治水為喪法

古今人表註雖陶已下背瞬之友也並見尸子

梁傳引尸子曰

舞夏自天子至諸侯皆用八佾

### 呂氏春秋二十六篇

史記呂不韋招致士厚遇之主食客三千人是時諸

侯多辯士如荀卿之徒著書布天下不韋乃使其客

人人著所聞集論以為八覽六論十二紀二十餘萬

言以為備天地萬物古今之事號曰呂氏春秋索隱

曰八覽者有始孝行慎大先識審分審應離俗恃君

凡八十三篇六論者開春慎行貴直不苟似順士容凡三十六

篇十二紀者記十二月也有孟春等紀凡六十一篇是書以月紀

為首故以春秋名高誘注二十卷月令本十二月紀之

首章東萊呂氏曰不韋春秋成於始皇八年按呂氏

春秋維秦八年歲在涒灘秋甲子朔朔之日良人請

閏十二紀此其書成之歲月也涒灘者申也通鑑皇極經世始皇八年歲

在壬戌後呂氏春秋二年不韋當時人必不誤蓋後世昇厯者之差也

不韋引夏書曰

天子之德廣運乃神乃武乃文商書曰五世之廟可以觀怪萬夫之長可以生謀仲虺有言曰諸侯之德能自為取師者王者自為取友者存其所擇而莫如已者亡周書曰若臨深淵若履薄冰舜自為詩曰普天之下莫非王土率土之濱莫非王臣其舛異如此豈一字不能增損乎

司馬遷傳云不韋遷蜀世傳呂覽

淮南內二十一篇

淮南王安傳招致賓客方術之士數千人作為內書  
二十一篇外書甚衆又有中篇八卷言神仙黃白之  
術亦二十餘萬言安入朝獻所作內篇新出上愛秘  
之西京雜記安著鴻烈二十一篇鴻大也烈明也言  
大明禮教自云字中皆挾風霜揚子雲以為一出一  
入安與蘇飛李尚左吳田由雷被毛披伍被晉昌八人及諸儒大山小山之徒共講論道德總統仁義  
而著此書許慎注標具首  
皆曰問詁自名注曰記上

伯象先生一篇

新序公孫敖問伯象先生曰今先生收天下之術博觀四方之事久矣未能裨世主之治明君臣之義

荆軻論五篇

文章緣起司馬相如作荆軻讚文心彫龍相如屬詞始讚荆軻

農

神農二十篇

孟子有為神農之言者許行食貨志鼃錯引神農之

教曰有石城十仞湯地百步帶甲百萬而亡粟弗能  
守也呂氏春秋引神農之教曰士有當年而不耕者  
則天下或受其饑矣女有當年而不績者則天下或  
受其寒矣管子引神農之教曰一穀不登減一穀穀  
之法十倍汜勝之書亦引神農之教劉子引神農之  
法淮南子曰世俗之人多尊古而賤今故為道者必  
託之于神農黃帝而後入說

野老十七篇

真隱傳六國時人遊秦楚間年老隱居著書言農家  
事因為號

尹都尉十四篇

劉向別錄云尹都尉書有種芥葵蓼韭蔥諸篇

北史蕭大

園云種菽尋汜氏之書露葵微尹君之錄

唐志尹都尉書三卷

汜勝之十八篇

汜音凡

皇甫謐云本姓凡氏遭秦亂避地於汜水因改焉勝  
之撰書言種植之事子輯為燉煌太守隋唐有汜勝



之書二卷月令注農書曰土長冒櫛

國語注引陳根春土冒櫛

陳根

可拔耕者急發

正義云先師以爲記勝之書

周禮草人注化之使

美若記勝之術也疏云漢時農書有數家記勝爲上

後漢劉般傳注文選注缺

學記太平御覽

皆引之

晉食貨志漢遺輕車使者記勝之督三輔種麥而關中遂穰

蔡癸一篇

食貨志宣帝時蔡癸以好農使勸郡國至大官太平

御覽崔元始正論曰宣帝使蔡癸校民耕相三犁共

一牛一人持之下種挽耬皆取備焉一日種頃蓋  
出於農耨之官

呂氏春秋任地篇后稷曰子能以室為突乎子能藏  
其惡而揖之以陰乎食貨志后稷始畊田

小說

伊尹說二十七篇

司馬相如傳注應劭曰伊尹書曰箕山之東青馬之  
所有盧橘夏熟呂氏春秋伊尹說湯以至味

箕山之  
東青馬

之所有甘櫨焉即應劭所引蓋戰國之士謂史記殷伊尹以割烹要湯故為是說孟子辯之詳矣

本紀伊尹從湯言素王及九主之事注引劉向別錄曰九主者有法君專君授君勞君寄君等君破君國君三歲任君凡九品圖畫其形

### 青史子五十七篇

風俗通義引青史子書大戴禮保傳篇青史氏之記

曰古者胎教隋志梁有青史子一卷

文心彫龍云青史子綴於街談

### 務成子十一篇

荀子舜學於務成昭注尸子曰務成昭之教舜曰避天下之逆從天下之順天下不足取也避天下之順從天下之逆從天下不足失也

宋子十八篇

孫卿道宋子

荀子云宋子有見於少無見於多注宋鉏宋人也與孟子同時

孟子作宋經

又云宋子蔽於欲而不知得又引

子宋子曰明見侮之不辱使人不鬪

注莊子說宋子曰見侮不辱教

民之閭宋子蓋尹文弟子

又云子宋子曰人之情欲寡而皆以

己之情欲為多是過也

天乙三篇

賈誼書脩政語引湯曰云云史記殷本紀湯曰予有  
言人視水見形視民知治不

虞初周說九百四十三篇

郊祀志丁夫人雒陽虞初等以方祠誼匈奴大宛焉  
孔子曰雖小道必有可觀者焉

按論語子夏曰云云非孔子之言蔡邕曰小能小善

雖有可觀孔子以為致遠則泥蓋因此志之誤

相反而皆相成也

致堂胡氏曰夫仁以親親義以尊尊施之雖有等衰發端則非異道故事父孝則忠可移求忠臣則於孝子未聞相反之理也曰法則慘刻曰名則苛繞曰墨則二本曰從橫則妾婦之道是皆五經之棄也其歸豈足要乎儒家者流因修六藝矣列儒於九家而曰修六藝之術以觀九家之言則修六藝者無所名家

謂誰氏耶何以言之多舛也

漢藝文志考證卷七